

**Najib Lawat China Peringati Ulang Tahun Ke-40 Hubungan Diplomatik
Bernama
Mei 26, 2014
Oleh D. Arul Rajoo**

BEIJING, 26 Mei (Bernama) -- Empat puluh tahun selepas lawatan yang cukup bersejarah dan berpandangan jauh Perdana Menteri kedua Malaysia Tun Abdul Razak Hussain ke China, anaknya Datuk Seri Najib Tun Razak pula tiba di sini esok untuk melakar satu lagi peristiwa penting dalam hubungan bilaterial dua negara.

Perdana Menteri akan memulakan lawatan enam hari ke negara ekonomi kedua terbesar di dunia itu dengan singgah di wilayah Xi'an, salah sebuah bandaraya tertua di China.

Pada Rabu, beliau akan terbang ke ibu negara China untuk menemui pemimpin-pemimpin kanan China dan memperingati peristiwa bersejarah ulang tahun ke-40 penubuhan hubungan diplomatik China-Malaysia pada 31 Mei.

Semasa lawatannya, Najib dijadual menjadi hos sidang kemuncak ekonomi dihadiri oleh ahli-ahli perniagaan dan perwakilan China untuk mempertingkatkan kerjasama ekonomi.

Malaysia berminat menarik lebih banyak usahawan China untuk melabur.

Menurut laporan, sejumlah 500 bilion yuan tersedia untuk pelaburan di seberang laut dalam beberapa tahun akan datang.

Pada 1974, Allahyarham Abdul Razak memulakan era bersejarah bila beliau pertama kali menjalin hubungan bilateral dengan China, ketika negara itu masih mengamalkan dasar pintu tertutupnya kepada kebanyakan negara di dunia.

Malaysia merupakan negara Asean pertama mengadakan hubungan diplomatik dengan China pada era Perang Dingin di tahun-tahun 1960an dan 1970an.

Hasil pandangan jauh Abdul Razak, Malaysia menikmati faedah besar dalam beberapa tahun, dari segi peningkatan perdagangan dan menggalakkan hubungan rakyat dengan rakyat.

Malahan, persahabatan telah bermula beberapa kurun sebelumnya, bila pelayar tersohor China Zheng He tiba di Melaka pada zaman Kesultanan Melayu, semasa pemerintahan Dinasti Ming di China.

"Peribahasa Melayu berbunyi, 'Air dicincang tak akan putus' dan tidak ada istilah yang lebih tepat untuk menjelaskan hubungan persahabatan tradisional antara China dan Malaysia," kata Presiden China Xi Jinping semasa lawatannya ke Malaysia Oktober lepas.

Duta Besar China ke Malaysia Huang Huikang berkata pada Majlis ulang tahun ke-40 Hubungan Diplomatik China-Malaysia di Kuala Lumpur minggu lepas bahawa lawatan sulung Abdul Razak ke China merupakan "kembara muhibah" dan langkah paling penting ke arah menjamin persahabatan berkekalan antara kedua-dua negara.

"Semasa lawatan bersejarah itu, Abdul Razak menemui Pengerusi Mao Tse-tung dan Perdana Menteri Zhou En-lai.

"Kedua-dua pemimpin menyatakan komitmen saling mempercayai dan membantu satu sama lain.

"Bila Pernyataan Bersama ditandatangani, China dan Malaysia secara rasmi menubuhkan hubungan diplomatik, dan menyemai benih hubungan bilateral yang kukuh," kata beliau.

Empat dekad lepas menyaksikan peningkatan hubungan persefahaman bersama, kerjasama akrab dan persahabatan tulen.

Dari jumlah perdagangan bilateral kurang dari US\$200 juta dalam 1974, angka itu meningkat ke US\$106 bilion pada 2013, pertambahan lebih dari 500 kali.

Sektor lain juga berkembang pesat, misalnya terdapat kira-kira 10,000 pelajar China di Malaysia dan lebih 6,000 pelajar Malaysia di China.

Malah kehilangan pesawat Malaysia Airlines Penerbangan MH370 tidak langsung menjejaskan hubungan kukuh negara ini, kata Huang.

"Hubungan kita tidak pernah terjejas oleh sebarang insiden luar jangka.

"Menerusi kerjasama dalam menangani insiden, hubungan kita semakin kukuh dan akrab," kata beliau.

Pada 8 Mac, Penerbangan MH370 lenyap bersama 227 penumpang dan 12 kru. Hampir dua pertiga daripada penumpang adalah warga China.

Hubungan rapat dan mesra terus meningkat dengan ketibaan dua panda gergasi China di Malaysia minggu lepas, yang dilihat sebagai simbol kepercayaan terhadap Malaysia.

Dua ekor panda itu akan berada di Malaysia selama 10 tahun sebagai satu lagi langkah memperingati ulang tahun ke-40 penubuhan hubungan diplomatik itu.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1041580>